

# ***Ag Tacú le Cruthú Post***

***Faoisimh chánach,***

***asbhaintí agus***

***díolúintí***

***Treoir na gCoimisinéirí Ioncaim***

## Clár Ábhair

1. Réamhrá
2. Scéim Postchúnaimh Na gCoimisinéirí Ioncaim
3. Faoiseamh Cánach do Chuideachtaí Nuathionscanta (Alt 486C den Acht Comhdhlúite Cánacha 1997)
4. An Scéim Síolchaipitil: Aisíocaíochtaí Cánach d'Fhiontair Nua
5. An Dreasacht Fostaíochta agus Infheistíochta
6. Faoiseamh i gcomhair Athoiliúna
7. Deontais Fostaíochta agus Fóirdheontais Earcaíochta áirithe le hÍoc Saor ó Cháin

## Misean na gCoimisinéirí Ioncaim

*Freastal ar an bpobal  
trí cháin agus dleacht a bhailiú  
go cothrom agus go héifeachtach  
agus srianta onnmhairithe  
agus allmhairithe a chur i bhfeidhm.*

TÁ SÉ I GCEIST LEIS AN TREOIR SEO CUR SÍOS A DHÉANAMH AR AN ÁBHAR AR BHONN GINEARÁLTA. MAR SIN, NÍ DHÉANTAR IARRACHT GACH SAINCHEIST A D'FHÉADFADH A THEACHT ANÍOS MAIDIR LEIS AN ÁBHAR A CHLÚDACH. NÍ LÉIRMHÍNIÚ DLÍ AR NA FORÁLACHA REACHTÚLA ATÁ I GCEIST LÉI, AGUS MAR SIN, NÍ FÉIDIR AON FHREAGRACHT A GHLACADH AS DLITEANAS AR BITH A THABHAÍTEAR NÓ AON CHAILLTEANAS A THARLAÍONN MAR THORADH AR A BHEITH AG BRATH AR AON ÁBHAR ATÁ FOILSITHE ANSEO.

## **1. Réamhrá**

Is é an aidhm atá leis an treoir seo ná breac-chuntas ghinearálta a thabhairt maidir leis na faoisimh, na hasbhaintí agus na díolúintí cánacha a chuireann le cruthú post.

Cé go bhfuil iarracht déanta againn breac-chuntas réasúnta cuimsitheach a thabhairt maidir le gach scéim/faoiseamh, d'fhéadfadh sé go mbeidh tuilleadh eolais uait maidir leis na scéimeanna nó na faoisimh ar leith ina bhfuil suim agat. Más amhlaidh atá, is féidir leat rochtain a fháil ar láithreán gréasáin na gCoimisinéirí Ioncaim [www.revenue.ie/ga](http://www.revenue.ie/ga) nó teagmháil a dhéanamh leis an oifig is gaire duit de chuid na gCoimisinéirí Ioncaim. D'fhéadfadh sé go mbeadh suim agat i mbileog eolais na gCoimisinéirí Ioncaim **IT48 "Starting in Business" (Ag bunú gnó)**, atá ar fáil ar láithreán gréasáin na gCoimisinéirí Ioncaim.

## **2. Scéim Postchúnaimh Na gCoimisinéirí Ioncaim**

Tá Scéim Postchúnaimh na gCoimisinéirí Ioncaim deartha chun daoine atá dífhostaithe go fadtéarmach a spreagadh chun glacadh le fostaíocht agus chun dreasacht a thabhairt d'fhostóirí daoine mar sin a fhostú.

### **Sochar do na fostaithe**

Is liúntas é Postchúnaimh na gCoimisinéirí Ioncaim a thógtar ó ioncam iomlán an fhostaí incháilithe chun ioncam inchánach a ríomh sula gcuirtear rátaí cánacha i bhfeidhm, agus mar sin lena dtugtar faoiseamh ag ráta imeallach cánach an duine aonair.

Tá forálacha in Alt 472A den Acht Comhdhlúite Cánacha 1997 a fhágann gur féidir asbhaint a dhéanamh ó ioncam iomlán aon duine atá dífhostaithe go fadtéarmach sna trí bliana chánach tar éis dó nó di glacadh le fostaíocht. Tá asbhaint bhreise ar fáil freisin i leith gach linbh cháilithigh. Tugtar an Liúntas Postchúnaimh ar an bhfaoiseamh.

### **Sochar do na fostóirí**

Tá forálacha in Alt 88A den Acht Comhdhlúite Cánacha 1997 chun asbhaint dhúbailte a dhéanamh nuair a bhíonn brabús maidir le ceird nó gairm á ríomh ó thaobh tuilleamh, agus i leith ranníocaíocht ÁSPC an fhostóra ar na tuillimh sin, arna n-íoc le fostaí incháilithe san chéad 36 mí d'fhostaíocht incháilithe.

Tá sonraí iomlána na scéime leagtha amach i mbileoga eolais **IT58** agus **IT59** atá ar fáil ar láithreán gréasáin na gCoimisinéirí Ioncaim.

## **3. Faoiseamh Cánach do Chuideachtaí Nuathionscanta (Alt 486C den Acht Comhdhlúite Cánacha 1997)**

### **Achoimre**

Déantar foráil in Alt 486A den Acht Comhdhlúite Cánacha 1997 d'fhaoiseamh ó Cháin Chorparáide do chuideachtaí nuathionscanta sna chéad trí bliana trádála. Cuirtear an faoiseamh sin ar fáil i leith brabús ó thrádáil nua agus gnóthachain inmhuirir ar dhiúscairt sócmhainní a úsáidtear sa trádáil. Bíonn faoiseamh i gceist i gcás ina bhfuil an Cháin Chorparáide iomlán iníoctha i leith tréimhse chuntasaíochta níos ísle ná €40,000, le faoiseamh imeallach ar fáil i gcásanna ina bhfuil an Cháin Chorparáide iníoctha idir €40,000 agus €60,000.

Tá luach an fhaoisimh nasctha leis an méid ÁSPC Fostóirí atá íoctha ag cuideachta i dtréimhse cuntasaíochta, faoi réir ag uasmhéid €5,000 in aghaidh an fhostaithe mar aon le teorainn

fhoriomlán €40,000. Tugtar creidmheas freisin i leith aon ÁSPC d'fhostóirí atá díolmhaithe faoin Scéim Dreasachta Poist (ÁSPC) d'Fhostóirí i leith fostaithe na cuideachta chun an faoiseamh cánach corparáide atá ar fáil don chuideachta a ríomh.

## **Eisiaimh ó fhaoiseamh**

Ní bhaineann an scéim le trádáil a bhí ar bun cheana féin ag duine eile nó a bhí mar chuid de thrádáil duine eile, trádáil a bhaineann le díol nó forbairt talún nó taiscéalaíocht agus eatóscadh acmhainní nádúrtha, trádáil atá comhdhéanta de ghníomhaíochtaí “cuideachta seirbhíse” mar a shainítear í in Alt 441 den Acht Comhdhlúite Cánacha 1997 (lena n-áirítear cuideachtaí a bhfuil a ngnó comhdhéanta de chur i gcrích gairme nó soláthar seirbhísí gairmiúla nó feidhmiú oifige nó poist). Baineann an t-eisiaimh le trádáil bunaithe ag cuideachta nua, a mbeadh na gníomhaíochtaí, dá mbeidís ar siúl ag cuideachta comhlachaithe den chuideachta nua, ina gcuid de thrádáil reatha na cuideachta comhlachaithe.

## **Tuilleadh Sonraí**

Tá sonraí na scéime faoisimh ó Cháin Chorparáide do chuideachtaí nuathionscanta (Alt 486 den Acht Comhdhlúite Cánacha 1997) leagtha síos in **Faisnéisiú Cánach Uimh. 6 de 2010** agus **Uimhir 1 de Mhárta 2011**.

# **4. An Scéim Síolchaipitil: Aisíocaíochtaí Cánach d'Fhiontair Nua**

## **Achoimre**

Más fostaí nó duine dífhostaithe tú nó má rinneadh iomarcach thú le déanaí, agus má tá suim agat do ghnó féin a thosú, d'fhéadfadh sé go mbeifeá i dteideal úsáid a bhaint as an aisíoc cánach atá ar fáil faoin Scéim Síolchaipitil.

Is féidir le duine aonair nó le fostaí dífhostaithe a fhágann fostaíocht agus a dhéanann infheistíocht trí scaireanna i gcuideachta, a chuireann gnó nua ar bun, aisíocaíocht den cháin ioncaim a íocadh i mblianta roimhe sin a éileamh.

## **An Aisíocaíocht**

- D'fhéadfá an cháin ioncaim go léir a d'íoc tú le sé bliana a fháil, má tá d'infheistíocht sách mór,
- Is féidir leat na blianta cánach ar féidir leat aisíocaíochtaí a éileamh ina leith a roghnú ó aon cheann den sé bliana roimh an bhliain infheistíochta nó ó na sé bliana go léir. Ní mór d'infheistíocht a éileamh suas go huasmhéid d'ioncam iomlán i ngach ceann de na blianta roghnaithe (faoi réir uasmhéid de €100,000). Níl aon áis ar fáil trínar féidir an infheistíocht a leathadh thar roinnt blianta ionas gur féidir úsáid a bhaint as liúntais phearsanta i ngach bliain,
- Tá an aisíocaíocht teoranta don cháin a d'íoc tú i gcás gach ceann de na blianta atá roghnaithe, le huasteorainn de €100,000 ar an gcáin a íocadh in aon bhliain,
- Is féidir an aisíocaíocht a éileamh chomh luath is a théann an chuideachta i mbun trádála,
- Má fuair tú faoiseamh um Scéim Méadaithe Gnó cheana féin i gcás aon cheann den sé bliana atá roghnaithe is é an méid faoisimh atá ar fáil duit ná an difríocht idir €100,000 agus méid na hinfeistíochta bunaidh sa Scéim Méadaithe Gnó,
- Is féidir leat aisíocaíocht a fháil ar an mbealach sin ar dhá infheistíocht sa chuideachta a dhéantar laistigh de thréimhse trí bliana. Ní mór an dá infheistíocht a dhéanamh sa chuideachta chéanna, áfach.

## **Ag Tacú le Cruthú Post**

Tá sonraí iomlána na scéime, lena n-áirítear na coinníollacha a bhaineann leatsa mar infheisteoir agus na coinníollacha a bhaineann leis an gcuideachta, leagtha amach i mbileog eolais **IT15** atá ar fáil ar láithreán gréasáin na gCoimisinéirí Ioncaim [www.revenue.ie/ga](http://www.revenue.ie/ga).

## **5. An Dreasacht Fostaíochta agus Infheistíochta**

Tugadh an tionscnamh seo isteach faoin Acht Airgeadais 2011 agus déanann sé athchóiriú agus síneadh ar an Scéim Méadaithe Gnó mar a tugadh air roimhe sin.

### **Achoimre**

Cuireann an scéim ar chumas duine incháilithe a dhéanann infheistíocht incháilithe (uasmhéid €150,000 do bhliain aonair ar bith) i gcuideachta incháilithe tríocha daichead is a haonú (.i. 30/41) de chostas na hinfheistíochta a asbhaint óna n-ioncam iomlán i mbliain na hinfheistíochta. Ceadófar asbhaint bhreise de aon déag daichead is a haonú (.i. 11/41) de chostas na hinfheistíochta, má tharlaíonn sé, thar thréimhse shealbhaíochta trí bliana, go bhfuil a líon fostaithe méadaithe ag an gcuideachta nó go bhfuil a caiteachas ar thaighde agus ar fhorbairt méadaithe aici.

Féadfar an infheistíocht a thabhairt ar aghaidh go blianta amach anseo murar féidir leis an infheisteoir an asbhaint iomlán dá bhfuil sé nó sí i dteideal a thógáil in aon bhliain amháin. Ní mór don duine aonair an infheistíocht a shealbhú ar feadh trí bliana ar a laghad. Tá sé beartaithe faoi láthair deireadh a chur leis an scéim in 2013.

Tá sonraí iomlána na gcoinníollacha a bhaineann leis an infheistíocht, leis an gcuideachta agus le gníomhaíochtaí cáilíochta na cuideachta ar fáil ar láithreán gréasáin na gCoimisinéirí Ioncaim [www.revenue.ie/ga](http://www.revenue.ie/ga).

## **6. Faoiseamh i gcomhair Athoiliúna**

I gcás ina dtabhaíonn fostóir, mar chuid de phacáiste iomarcaíochta fostaí, an costas a bhaineann leis an bhfostaí a athoiliúint - mar shampla, chun an deis a bheidh aige nó aici post a fháil tar éis na hiomarcaíochta a fheabhsú - ní bheidh an chéad €5,000 inchánach i lámha an fhostaí atá ar iomarcaíocht.

Tá fócaíochtaí iomarcaíochta reachtúla díolmhaithe ó cháin. Ina theannta sin, tá fócaíochta iomarcaíochta ex gratia os cionn na hiomarcaíochta reachtúla, **lena n-áirítear soláthar athoiliúna**, saor ó cháin freisin suas go teorainneacha reachtúla áirithe.

Ní mór an athoiliúint a bheith:

- d'fhostaí ag a bhfuil os cionn dhá bhliain de sheirbhís lánaimseartha leanúnach,
- ina cuid de phacáiste iomarcaíochta agus é deartha chun feabhas a chur ar scileanna nó ar eolas a úsáidtear chun fostaíocht a fháil nó chun gnó a bhunú,
- curtha i gcrích laistigh de shé mhí ón uair a ndéantar an fostaí iomarcach.

Ní bhaineann an díolúine le céile, páirtí sibhialta nó cleithiúnaithe an fhostóra, agus ní mór don fhostaí leas a bhaint as an oiliúint ós rud é nach féidir leis nó léi airgead a thógáil ina áit.

## **7. Deontais fostaíochta agus fóirdheontais earcaíochta áirithe le hÍoc saor ó cháin.**

Leis an rannán seo déantar foráil go bhfuil neamhaird le déanamh ar dheontais fostaíochta nó ar fhóirdheontais earcaíochta áirithe a íoctar le fostóir a fhostaíonn duine nó daoine faoi scéimeanna fostaíochta áirithe, chun críocha uile na nAchtanna Cánacha.

Is iad na deontais agus na fóirdheontais ábhartha iad siúd a íoctar:

- faoin scéim um fhilleadh ar an obair arna riar ag an Roinn Coimirce Sóisialaí,
- faoi aon scéim arna bhunú ag an Roinn Post, Fiontar agus Nuálaíochta a chuireann chun cinn fostaíocht daoine aonair a bhí dífhostaithe le trí bliana nó níos mó,
- faoi aon chomhaontú oibriúcháin idir an Aire Post, Fiontar agus Nuálaíochta agus na Boird Fiontar Contae,
- ar nó tar éis an 6 Aibreán 1997, faoin Scéim Tacaíochta Fostaíochta arna riar ag an Údarás Náisiúnta Míchumais,
- ar nó tar éis an 6 Aibreán 1997, faoin Treoirhionscadal um Fhostaíocht Dhaoine le míchumais arna riar ag an nGrúpa Rehab,
- faoi Scéimeanna Comhpháirtíochta Ceantair, arna riar ag Area Development Management Limited faoi Chlár Oibriúcháin an AE um Fhorbairt Áitiúil, Uirbeach agus Tuaithe,
- faoin gClár Speisialta um Shíocháin agus Athmhuintearas i dTuaisceart Éireann agus i gContaetha na Teorann, nó
- faoi aon tionscnamh de chuid an Chiste Idirnáisiúnta d'Éirinn.